

rir. tu es mort si on te baptise. Je veux qu'on me baptise, respond-il, car ie redoute trop ces flammes qui bruslent tout, & iamais ne finissent. Dieu scait de quel cœur ie conferay ce S. Baptisme, mais les deux [112] autres freres n'eurent pas assez de courage pour en cela desobeir sainctement à leur mere. Huiët iours apres ie retourne les voir, celuy que i'auois baptisé ne l'auoit pas fait longue, les deux autres estoient rechapez: de quel œil pouuoit on me voir? & cette pauure mere n'auoit-elle pas quelque raifon d'auoir le baptisme en horreur, & celuy qui l'auoit conferé.

Au reste cét autre frere qui leur estoit mort l'Esté precedent, apres auoir receu le sainct baptisme, nous auoit fait paroistre vne prouidence de Dieu bien particuliere sur luy. Le P. Garnier arriua heureusement en ce bourg, à l'heure mesme qu'on y rapportoit ce ieune homme qui estoit desia quasi mort: lors qu'ils estoient à la pesche à deux iournées de leur pays, vne nation incogneuë s'estoit venu ietter sur leur cabane, & auoit tué sur le lieu trois ou quatre de nos Hurons, quelques autres estans eschappez. Celuy-cy voyant vne gresle de fleches fondre sur eux, au lieu de prendre la fuite, prit entre ses bras vn petit frere qu'il auoit, & auoit paré tous les coups qu'on decochoit [113] sur ce petit innocent, les receuant luy-mesme sur son corps, avec vn courage & vn amour fraternel qui semble auoir quelque chose plus que la nature. En effect il conferua ce petit frere, mais luy fut transpercé de fleches, & tomba comme mort sur celuy qu'il vouloit couvrir de son corps en mourant. Les ennemis s'estans retirez, ceux qui auoient pris la fuite retournerent au lieu où s'estoit